



Nuuk, 17.12.2019

UPA2019/39

Inatsisartut Suleriaasianni § 33 naapertorlugu aalajangiiffigisassatut siunnersuut imaattoq matumuuna saqqummiuppara:

Aningaasanut inatsimmi konto pingaarneq 64.01.05 naapertorlugu inuussutissarsiutitigut nunaqarfinnut isorliunerusunullu siuarsaanermik tapiissutinik suliassap ulloq 1. januar 2020 aallarnerfigalugu Namminersorlutik Oqartussanit kommuninut nuunneqarnissaanik, apeqqutillu tassunga attuumassuteqartup 2019-p ingerlanerani kommuninik ataatsimoortumik tapiissutinik isumaqatiginninniarnermut ilanngunneqarnissaanik Naalakkersuisut peqquneqarnissaat pillugu Inatsisartuni aalajangiiffigisassatut siunnersuut.

(Inatsisartunut ilaasortaq Aqqaluaq B. Egede, Inuit Ataqatigiit)

Inuussutissarsiortut sineriammiipput. Inuussutissarsiortut kommuniniipput. Inuussutissarsiortut nunaqarfinni illoqarfinnilu inissisimapput. Inuussutissarsiortut pisortanit sullinneqarnerat kommuniniittariaqarpoq. Kommunini inuussutissarsiutit sulisartorpassuillu siunissami qanoq ineriartortitserusunnerisa, qanorlu anguniagaqarneri attaveqarfiguarnerisigut ilisimallugit kommunit kifartuussilluarnissaannut toqqammavigissaarnerupput.

Namminersorlutik Oqartussat naalakkersuisut akissutaasigut kusanavimmik sullissisutut isikkoqartarput. Sinerissamilu angalagaangatta inuit tusarnaartarpagut, paasisarparpullu Namminersorlutik Oqartussat inuussutissarsiutinik inerisaaniartunut aporfileruinerujussuarnik ingerlatseriaaseqartut.

Pissusiviusullu inuit sineriammiittut atorpaat. Pissusiviusut naalakkersuinikkut oqaatsit kusassakkat atukkavut ilisarisinnaangilaat. Aningaasat timitaliinermi atugassat innuttaasunit kissaateqarfiusunik anguniagaqarfiusuniillu atugassiarineqartussat ungasippallaarput.

Naalakkersuisoqarfiit inuit atugaannut qanimut paasisimasaqassutsimikkut killeqarpallaariartorerisa kingunerisaanik atorfilittat ataasiakkaat siunnersuineri kisiisa aallaavigalugu nunarput sanarfineqariartuinnarsinnaanerata pissaanerup equngajartuinnarneranik kinguneqartarpoq, tamanna sianigisassaavoq.. Nunarput aamma inuit aallartitaannik naalakkersuisoqartariaqarpoq atorfilittanik aamma aqutsisinnaasunik.

Taamaammat siunnersuut una ukiuni arlalippassuarni politikikkut suliaqareerluni paasisimasariaqartut malinnaavigereersimallugit itigartissallugu inuiaqatigiit isumaannut assortuuttuussoraara. Allaffissornerujussuaq atuuppoq. Allaffissornerujussuaq innuttaasunut inuussutissarsiutinik aallarnisaasunut inorsittaarisooq erligisutut attanniaannarsinnaangilarput.

Inuit suliffissameertut amerlaqaat. Suliffissaaleqineq suuliffissanik paarlatseqassappat pissutsit massakkut ajornartorsiutaasut allanngortariaqarput. Tassa allanngortiteriniarta akisussaaffik tigummivarput. Nunarput inuussutissarsiornikkut ingerlalluortoq anguniagaavoq, anguneqarsinnaangilarli inunnik allanngutsaaliuisunik nuna siuttoqartillugu. Isumaqarpunga takutissinnaagipput nunarput siuttoqartoq aamma allannguisinnaasunik. Ajornartorsiutinillu aaqqiissuteqarsinnaasunik.

Tassami kommunit amerlanerpaat inuussutissarsiortunik pisariaqartitsipput aningaasarsiornikkut piffimmini kaaviiartitsilluartunik. Aningaasanik aqutatsinnik kommuninut nuussiniarta kommunit aningaasaqarnermikkut aamma nukittoqutigissavaat. Suliassartaasa siunertaat kommunini suliarissallugit pissusissamisoorerupput. Allatut oqaatigalugu ukiut kingulliit qulit sinnerlugilluunniit inuussutissarsiutinik siuarsaanissamut aningaasalersuerujussuaratta naak suliffippassuit pilersitagut? Aningaasaliissutit annertussusaannut sanilliullugu inuussutissarsiutit pilersissimasagut ”ersaartaassutissaanngillat” amerlanngeruttoramik.

Tassa allanngortoqartariaqarpoq. Kommunit innuttaasalu nukittorsarnissaat aallartinniartigu. Maani Namminersorlutik Oqartussat aningaasarpassuarnik ingerlatsiuassaguni, sineriammilu iloqarfiit ullumikkut pissutsit malillugit katakkiartuinnassagutsigit taava kiap siunertaa malillugu sulisimassaagut? Uagut siunertarput naqissuserniartigu. Tassa kommunit imminnut kivinnissaat, siuarsarnissaat, suliffissanillu ineriartortitsinissamut sinaakkusersueqataanissaat tunngavilerniartigu. Pisariaqarpoq ullumikkutut ingerlaannarnata allannguinnisarput.

Taamatut oqaaseqarlunga siunnersuut saqqummiuppara, neriullunga inatsisartunit ilalersorneqassasoq.

Pisortanut aningaasatigut allaffissornikkullu kingunerisassai:

Siunnersuut aningaasanik assigiinnik allaffissornikkullu assigiinnik tunngammat pisortanut (Namminersorlutik Oqartussanut kommuninullu) immikkut taasarialinnik aningaasatigut allaffissornikkullu kinguneqaateqarnissaa ilimagineqanngilaq, taamaattoqassappallu kommuninit tiguneqassapput.

Namminersortunut aningaasaatigut allaffissornikkullu kingunerisassai:

Siunnersuut aningaasanik assigiinnik allaffissornikkullu assigiinnik tunngammat namminersorlutik inuussutissarsiortunut isumaginnittussanut immikkut taasarialinnik aningaasatigut allaffissornikkullu kinguneqaateqarnissaa ilimagineqanngilaq.

Innuttaasunut aningaasatigut allaffissornikkullu kingunerisassai:

Innuttaasunut immikkut taasarialinnik aningaasatigut allaffissornikkullu kinguneqaateqarnissaa ilimagineqanngilaq.